

Vuk'uzenzele

O e tlisediwa ke Ditlhaeletsano tsa Puso (GCIS)

English/Setswana

Sedimonthole 2022

Melemo ya PrEP e ka dira gore motho a se fetelwe ke HIV



Allison Cooper

Jaaka Aforika Borwa e tla bo e keteka Letsatsi la Lefatshe la go Tlhotlheletsana Twantsho ya AIDS ka la bo 1 Sedimonthole mmogo le go keteka gape le Letsholo la go Lwela Ditshwanelo tsa Basadi la Matsatsi a le 16 la go Ema Kgatlanong le Tirisodikgoka mo Basading (GBV) go tloga ka la bo 25 Ngwanaitseele go fitlha ka la bo 10 Sedimonthole, ba *Vuk'uzenzele* ba ne ba sekaseka ka fao GBV le HIV/AIDS di amang basadi ka teng.

Ka fa nageng ya Aforika Borwa Letlole la Tsibogelo ya Tirisodikgoka e e Totileng Batho ba Bong jo bo Rileng le Dipolao tsa Basadi (GBVF) le leka ka natla go fedisa GBVF mo basading; mo baneng; le mo baaging ba bangwe ba naga ya rona ba e leng basadi ba ba ratanang le basadi ba bangwe, banna ba ba ratanang le banna ba bangwe, batho ba ba ratanang le batho ba bong jo bo tshwanang le jwa

bona mmogo le ba joo bo farologaneng le jwa bona, batho ba ba fetotseng bong jwa bona, batho ba ba lebegang e le ba bong jo bo rileng fela ba na le dikarolo tsa bong jo bo rileng, batho ba ba itsayang gore ke ba bong jo bo sa tlwaelegang, batho ba ba senang maikutlo a go ratana le batho ba bangwe mmogo le batho ba bangwe ba mothale ono (LGBTQIA+).

Letlole leno le thankgo-lotswe ke Moporesitente Cyril Ramaphosa ka Tlhakole 2021, maitlhommo e le go ema nokeng dikgato tsa go tsenya tirisong Leano la Naga la Togamaano mo Mererong ya GBVF. Go ya ka webesaete ya letlole leno, mosola wa lona ke go nna le seabe se se botlhokwa thata mo go tliseng diphetogo, mme seno se tla diragala ka ntlha ya dipatlisiso tse di diriwang, matsholotemoso a a diriwang a go bula baagi matlho mmogo le ka go tsaya dikgato tse di bonagalang go ema nokeng mekgatlho e e lwantshanang le GBVF.

O mongwe wa mekgatlho e e enngweng nokeng ke letlole leno ke Mokgatlo wa Gugu Dlamini o o leng kwa porofenseng ya KwaZulu-Natal o o neetsweng R250 000 ke ba Letlole la Tsibogelo ya GBVF mo ngwangeng wa 2022.

Mokaedi yo Mogolo wa Mokgatlo wa Gugu Dlamini, Mandisa Mabaso, o tlhomile mekgatlho ono ka 2010 morago ga gore mme wa gagwe – Gugu Dlamini yo ga jaanong a iketseng badimong – yo a neng a a bolawa

ka go konopiwa ka matlapa ka ngwaga wa 1998 kwa Durban a bolaelwa gore o ne a ntsha khupamarama ya gore ene o na le HIV.

“Maitlhommo a mokgatlo ho ke go gagamatsa dipusoselegae gore di tlhabolole ditsela tseo di tsibogelang ka tsona ditiragalo tsa GBVF, e leng selo se se botlhokwa thata mo go direng gore leroborobo la HIV le se tswe mo taolong ka fa nageng ya Aforika Borwa,” ga rialo Mabaso.

“Maitlhommo a mangwe gape ke a go dira gore ditshwaetso tsa HIV/AIDS di fokotsege, go dira gore batho ba bantsi ba bone ditirelo tsa tlhokomelo ya boitekanelo le go dira gore banna le basadi ba ba tshwerweng ke HIV/AIDS le bao e amang matshelo a bona ba bone ditharabololo,” o tlaleditse ka go rialo.

Tshegetso ya matlole e mokgatlo ono o e amogelang e thusa basadi le basetsana ba le kanaka 522 255 mmogo le banna le basimane ba le kanaka 900 mo malapeng a a wetsweng ke leru leno la GBV le la tirisodikgoka magareng ga batho ba ba amanang; go thusa batho ba ba tshelang ka bogolofadi ba ba bogisiwang; mmogo le go thusa batho ba LGBTQIA+, ga rialo Mabaso.

Go ya ka Mokgatlo wa Dinagakopano o o Samaganang le Merero ya AIDS (UNAIDS) mo mafelong a a nang le dipalo tse dintsi tsa batho ba ba tshwerweng ke HIV, batswasetilhabelo ba ditiragalo tsa GBV bao bantsi jwa bona e leng basadi ke bona

gantsi ba ba welwang ke dintelo tsa go tshwarwa ke HIV.

Amangwe a mabaka a a dirang gore ba welwe ke dintelo tseo ke ka ntlha ya gore ba a betelelwa e bile gape banna ba gapeletsa go robala le bona ba sa apara mesomelwana.

PrEP ke eng?

E nngwe ya ditsela tsa go thibela gore motho a se tshwaetswe ke HIV ke ya go nwa Melemo ya Thibelotshwaetso (PrEP), ono ke molemo o o tshwanetsweng go nwewa ke batho ba ba senang HIV letsatsi le lengwe le le lengwe ba go nang le kgonagalo e ntsi ya gore ba ka tshwarwa ke HIV, e ba fetela ka thobalano kgotsa ka go itlhaba ka lomao lwa tirisobotlhaswa ya diritibatsi.

Ka kgwedi ya Phatwe monngwaga Tona ya Lefapha la Boitekanelo Rre Joe Phaahla o tlhalositse gore mo Dinageng tse di ka fa Tlase tsa Bogare jwa Aforika naga ya Aforika Borwa ke yona e e nang le letsholo le legolo go di gaisa la PrEP. O tlhalositse gore bantsi jwa maokelo a ka dira 70% mo go ona otlhe kgotsa a le kanaka 2 419 a setse a abelana ka PrEP jaaka tse dingwe tsa ditirelo tsa ona tsa ka metlha.

“Motho yo a nwang melemo ya PrEP ga a gapeletsege go e nwa letsatsi le lengwe le le lengwe botshelo jwa bona johlhe, ba ka itseela tshwetso ya gore ba tla e enwa fa fela ba bona gore go na le kgonagalo e kgolo ya gore ba ka tshwaetswa ka HIV. Le fa

go le jalo, gore melemo eno ya PrEP e bereke, e tshwanetswe go nwewa letsatsi le lengwe le le lengwe [la paka eo],” Mabaso o totobaditse ntlha eo.

Melemo eno ya PrEP e tshwanetswe go dirisiwa mmogo le dilwana dingwe tsa go itshireletsa, tse di jaaka mesomelwana ya bomme le ya borre, go nne melemo eno ga e go sireletse kगतlanong le malwetse a mangwe a thobalano e bile gape ga e thibele batho go ka misana.

Mabaso o tlhalositse gore fa e le gore baratani ba batla go ka nna le leseanyana, PrEP e ka ba thusa gore yo mo go bona a senang HIV e se mo fetele le go dira gore le leseanyana la bona le lona le se fetelwe ke yona.

Ka fa letlhakoreng le lengwe, fa ngwaga ono o simolola ba Bothati jwa Taolo ya Melemo ya Boitekanelo ya Aforika Borwa (SAHPRA) ba ne ba nesetsa pula sedirisiwa sa bomme sa go thibela gore ba se ime se se somelwang ka fa teng ga serwe sa bomme gore le sona se ka dirisiwa fela jaaka PrEP. Sedirisiwa seno se na le molemo o o thibelang tshwaetso ya kokwanatlhoko o o bediwang *dapivirine* mme kgwedi e nngwe le e nngwe motho o tshwanetse go dirisa sedirisiwa seno se se ntshwa.

Mo godimo ga seno, go santse go letetswe gore molemo o

E tswelela mo go tsebe 2



Monate Coffee creates future entrepreneurs

Page 5



Teens determined to promote menstruation dignity

Page 11

Go buisa Vuk'uzenzele tsenya epe ya GOVAPP e o ka e fitlhelang mo go:

Morago o batle SA Government mo go Google playstore kgotsa mo go appstore

IKGOLAGANYE LE RONA MO GO Vuk'uzenzele @VukuzenzeleNews

Diwebesaete ke: www.gcis.gov.za Imeile ke: vukuzenzele@gcis.gov.za

www.vukuzenzele.gov.za

Mogala ke: (+27) 12 473 0103

Tshedimosetso House:

1035 cnr Francis Baard and Festival streets, Hatfield, Pretoria, 0083

VUK'UZENZELE KE MAHALA, GA E REKISIWE

E tswela go tswa mo go tsebe 1

mongwe o montšhwa wa PrEP – e leng wa lemao o o nngwe sebaka sa dikgwedi mo mading – le ona o nesebiwe pula. Fa ona o ka nesebiwa pula, batho ga ba sa tla tlhole ba sokola gore ba gopole go nwa pilisi letsatsi le lengwe le le lengwe.

Dikgato tse di bolokesezileng tsa go tsena mo thobalanong

Maitlhomomagolo a mokgatlo

ono ke go fokotsa dipalo tsa batho ba ba tshwaetswang ke HIV mme e batla go dira seno ka go rotloetsa gore go dirisiwe mesomelwana le go tsaya dikgato tse di bolokesezileng tsa go tsena mo thobalanong.

“Re ikuela mo baneng le mo bašweng gore ba se siane go tsena mo thobalanong mme ba letele gore ba gole ba butsweng gore ba kgone go tsaya ditshweetso tse di bolokesezileng ba na le tshedimosetso e e tletseng ka seo ba se dirang,” Mabaso o tlhalositse jalo.

“Re rotloetsa batho gape

gore ba tsaye dikgato tse di bolokesezileng tsa go tsena mo thobalanong ka go sola mesomelwana mosola mmogo le go ratana le motho a le mongwe go na le go nna le baratani ba le bantsi. Tirisobotlhaswa ya diritibatsi – le tsona tseo tsa go tlhabana ka lomao – ke selo se re sa dumelaneng le sona le e seng gonne ke yona e e oketsang dikotsi tsa kgonagalo ya go tshwaetsana ka HIV,” o tlaleditse ka go rialo.

Se sengwe gape ka mokgatlo ono ke gore o thusa batho ba ba angwang ke HIV/GBV kgotsa

ba ba tshelang ka tsona gore ba kgone go itsi ditshwanelo tsa bona le gore ba kgone go iponela ditirelo tsa phimolake-

ledi kgotsa tsa molao mmogo le gore ba kgone go ikemelela fa ba bona ditshwanelo tsa botho di gatakakiwa. **V**

Go bona tshedimosetso ka botlalo kgotsa go bona thuso mo Mokgatlong wa Gugu Dlamini, etela www.gugudlaminifoundation.org. Go bona tshedimosetso ka botlalo ka ga PrEP, etela bookelo jo bongwe le jo bongwe jo bo gaufi le wena.

Ke eng se motsadi yo a anyisang leseanyana yo a nang le HIV a tshwanetseng go se itse

Jaaka naga ya Aforika Borwa e tla bo e keteka Letsatsi la Lefatshe la go Tlhotlheletsa Twantsho ya AIDS ka la bo 1 Sedimonthole monongwaga, Lefapha la Boitekanelo la Porofense ya KwaZulu-Natal le eleditse batsadi ba ba nang le HIV ba ba anyisang maseanyana gore ba se fepe bana ba bona selo se sengwe ntle le letswela sebaka sa dikgwedi di le thataro.

Go ya ka lefapha leno, fa e le gore o motsadi yo a anyisang mme o na le HIV, go bothokwa gore o buisane le motlhankedi yo a go eletsang wa tsa HIV gore a go eletse ka seo o ka se fepang leseanyana la gago.

Fa e le gore o tsaya tshweetso ya gore o batla go anyisa, dira bonnete jwa gore o anyisa leseanyana la gago letswela fela o se le tswake le dijo tse dingwe.

Dipatlisiso di senotse gore fa e le gore lesea le anya mekgato fela mme le sa fepiwe dijo tse dingwe kgonagalo ya gore le tshwaediwe ke HIV e nna e e kwa tlase thata.

Mo dikgweding tsa fa o le mo mmeleng kgotsa fa o le motsetse dira bonnete jwa gore fa o tsenela ditiragalo tsa thobalano o dira jalo o sometse mosomelwana gore o se welwe ke malwetse a mangwe a thobalano a o senang ona. Fa e le gore o na le matsapa a mangwe mo mmeleng a go tshwana le go opelwa ke ditlhoko tsa

matswele kgotsa go opelwa ke matswele, dira bonnete jwa gore o ya bookelong go batla thuso.

Lefapha le rotloetsa tota go anyisa maseanyana mekgato e le esi gonne e thusa gore a nne le masole a mmele a a nang le maatla, e bile seno se dira gore maseanyana ano a nne le kgoagano e kgolo le bomme ba bona. Go anyisa go thusa gape le go fokotsa dikotsi tsa gore bomme ba maseanyana ano ba tshwarwe ke bolwetse jwa kankere ya matswele.

Maaka le nnete ka ga go anyisa

Go a tle go nne le dipuo di le dintsinayana tsa maaka fa go buiwa ka go anyisa, lefapha le tsere matsapa go phimola maaka ano ka go araba dipotso tse di latelang tse go le gantsi di a tleng di bodiwe ke batsadi ba ba nang le HIV mmogo le ba ba senang yona.

Potso: Moagisani wa me o nkeleditse gore ke reke melemo ya go tlhatswa khuba ya leseanyana la me. A ke tshwanetse go dira jalo?

Karabo: Kgatsele, ano ke mašwi/mekgato ya ntlha e e tswang mo letsweleng la phologolo nngwe le nngwe e e tshelang morago ga gore e belege, kgatsele eno e phepafatsa khuba ya setshedi ka go ntsha mantle a matala a ntlha a a tswang mo setsheding se e leng gona se belegiwa. Ka ntlha ya seno, ga go tlhokagale

gore o reke melemo e e tla e phepafatsang gonne mekgato ke yona e e tla e phepafatsang, e bile gape yona mekgato eno e bula mala le go a sireletsa gore a se nne le dikokwanatlhoko.

Potso: Fa lesea le sena go nna teng, fa e le gore ga kena mekgato e mentsi, a nka le nwea metsi kgotsa mašwi a mangwe fela?

Karabo: Lesea le itlhokela fela mekgato. Se o tlhokang go se dira ke go le anyisa kgafetsa kgafetsa gore letswela le simolole go nna le mekgato e mentsi - ke sona seo se dirang gore matswele a nne le mekgato.

Morago ga halofo ya ura fa lesea le sena go belegwa kopa mmelegisi gore a go neele leseanyana la gago gore o kgone go le anyisa. Lesea le tla ithuta ka bonako fela go anya mme ke sona selo seno se se tla dirang gore o nne le mekgato e mentsi.

Potso: Ke naya lesea mekgato, mme le bonagala e kete ga le kgore. A nka le anyisa lebotlolo?

Karabo: O seke wa bo wa leka, o ka kgona go dira gore o nne le mekgato e mentsi fa o ka anyisa lesea gangwe le gape. Anyisa lesea letswela le le lengwe gore le anye go fitlha le kgore gore le kgone go anya le mekgato ya bofelo mo letsweleng e leng mekgato e lesea le e anyang fa mekgato e fela mo letsweleng. Fa lesea le anya mekgato gangwe le gape, letswela le dira mekgato e mengwe e mentsi.

Potso: Leseanyana la me le anyetse ruri, gongwe mekgato e ke nang le yona ke e mennye?

Karabo: Go na le kgonagalo ya gore lesea le golela ka bonako, ka jalo le tlhoka mekgato e mentsi. Fa o le anyisa gangwe le gape letswela la gago le tla dira mekgato e mentsi e le e tlhokang gore le kgore. Mekgato e ka se fele mo letsweleng. Naya lesea nako e ntsinyana gore le iphantshe ka letswela - o seke wa ntsha letswela ka fa ganong la lona

Fa e le gore lesea la gago le kolobetsa mengato e feta e le merataro ka letsatsi, go raya gore le anyisiwa gangwe le gape ka tshwanelo (e ka nna go anyisiwa makgetlo a le marobedi go fitlha go a le lesome le bobedi ka letsatsi), mme gape lesea leo le a otloga ka go oketsa mmele ka dikeramo di ka nna 500 kgwedi e nngwe le e nngwe, mme seno se raya gore matswele a gago a dira mekgato e e lekaneng.

Potso: Fa e le gore leseanyana la me le leletse ruri, ke eng se nka se dirang?

Karabo: Kolobetsa petšwana ya lona ka go le baya mo sefubeng gangwe le gape. Masea a rata go nna gaufi le bomme ba bona Bomme ba masea ba tshwanetse go nna mo phaposing e le esi le ona, seno se tla dira gore a ikutlwe a le gaufi le bona.

Fa leseanyana la gago le tshwere ke tlala, le kgalegile kgotsa le sa itumela, fa le anya

letswela le tla itumela. Ga go kgonagale gore fa o anyisa o ka anyisa lesea go feta tekano.

Potso: A go siame gore nka nwea leseanyana la me dino tse dingwe?

Karabo: O seke wa bo wa leka, fa o naya leseanyana la gago dino tse dingwe go raya gore go na le kgonagalo ya gore le ka tshwarwa ke malwetse a mangwe a mantsi a a jaaka letshololo kgotsa malwetse a matshwafo a a rurugileng. Se sengwe gape ke gore fa leseanyana la gago le ka tlwaela go nwa dino tse dingwe, le ka se tlhole le anya gantsi mme ka jalo matswele a gago a ka se tlhole a kgona go dira mekgato e mentsi e e lekaneng.

Potso: A lesea ga le tlhoke go nwa metsi fa go le mogote?

Karabo: Nnyaa, mekgato ka boyona e na le metsi a le mantsi mo go yona mme ka jalo e kgona go timola lenyora mo maseeng. Wena o tshwanetse go dira bonnete jwa gore fa go le mogote o anyisa leseanyana la gago gangwe le gape.

Potso: Ke tla simolola neng go jesa leseanyana la me dijo tse dingwe ntle le letswela?

Karabo: Morago ga dikgwedi di le thataro o se kgaotse go anyisa leseanyana la gago mme o tswela go le anyisa mme o ntse o le naya dijo tse dingwe.

Mmele wa lesea o simolola go ka kgona go ja dijo tse dingwe morago ga dikgwedi di le thataro. **V**

**Tshedimosetso eno o e tlisediwa ke ba Lefapha la Boitekanelo la kwa Porofenseng ya KwaZulu-Natal.*



government communications

Department: Government Communication and Information System
REPUBLIC OF SOUTH AFRICA

Tel: 012 473 0353

Email: vukuzenzele@gcis.gov.za

Address: Private Bag X745, Pretoria, 0001

Head of Editorial and Production

Regomoditswe Mavimbela
Regomoditswe@gcis.gov.za

Acting Editor-in-Chief

Zanele Mngadi | Zanelemngadi@gcis.gov.za

Managing Editor

Tshepo Nkosi | Tshepon@gcis.gov.za

News Editor

Noluthando Motswai

Writers: More Matshediso

Graphic Designers

Tendai Gonese | Benny Kubjana

Production Assistants

Jauhara Khan | Sebastian Palmer

Language Practitioners

Nomgcibelo Motha | Boitumelo Phalatshe
Thandolunye Khulu | Mahanyele Ramapala



Vuk'uzenzele
is published by Government
Communications (GCIS)

Distributed by:
ON THE DOT

Printed by:
RISING SUN PRINTERS

The material in this publication may be reproduced, distributed, or transmitted in any form or by any means, including photocopying, recording, or other electronic or mechanical methods, without the prior permission of the publisher on condition that this publication shall be credited as the source.



Dipalopalo tsa batho ba ba thapiwang di a bontsha gore ikonomi ya rona e tswelela go itharabologelwa

Mo dingwageng di le mmalwa tse di fetileng ma-Aforika Borwa a ne a tobana le kgolo ya ikonomi e e gogang maoto mmogo le dipalopalo tse di goletseng ruri tsa batho ba ba tlhokang ditiro.

Tsona di ne tsa tlhotlhelediwa gape le ke leroborobo, ditshupetso tsa kgwedi ya Phukwi 2021, mmogo le merwalela e le mentsinyana mo ngwageng ono kwa tshimologong mo mafelong a le mantsinyana mo profofenseng ya KwaZulu-Natal, ya Kapa Botlhaba le ya Bokone Bophirima.

Mo godimo ga tsotlhe tseno, ditiragalo tsa go tshaba ga mabone le tsona di ne tsa gakala, tsa phuaganya ikonomi le go dira gore malapa le dikgwebo di goge boima.

Le fa tota re tsamaile re kopana le dikgwetlho tseno tsotlhe, setshaba sa rona mmogo le ikonomi ya rona di ne tsa ntsha ga tshwene. Se se iponagatsang jaanong ke gore ikonomi ya rona e bonagala e simolola go itharabologelwa.

Dipalopalo tsa batho ba ba thapiwang, segolobogolo tsa ga jaana, di dira gore re nne le tsholofelo.

Setheo sa Dipatlisiso tsa Dipalopalo sa Aforika Borwa (StatsSA) se rekotile gore dipalopalo tsa batho ba ba tlhokang ditiro di fokotsegile mo kotareng ya bobedi ya ngwaga wa 2021. Se se kgolo go gaisa ke gore go ya ka dipatlisiso tsa bona palo ya nnete ya batho ba ba nang le ditiro e tlhatlogile go tloga mo go ba le 14.5 milione mo kgweditharong ya bone ya ngwaga wa 2021 ya tlhatlogela go 15.5 milione mo kgweditharong ya bobedi ya ngwaga wa 2022. Go tlhatloga ga dipalopalo tseno go re tiisa mmooko jaaka ditiro tseno e le tsona tse di tlhokagalang thata mo pakeng ya ntlha ya monongwaga.

Ditiro tseno di tlhodilwe segolobogolo mo maphateng



a jaaka a ditirelo tsa setshaba le baagi, a kgwebisano, a matlole mmogo le a dikonteraka tsa go aga.

Le fa go le jalo, go santse go na le dilo tse dintsi tse di tshwanetsweng go diriwa gore re nne le phokotsego e e bonagalang mo dipalopalong tsa naga ya rona tsa batho ba ba tlhokang ditiro.

Ka fa letlhakoreng le lengwe, dipalopalo tseno di re bolelela gore dikarolo tsa Leano la Tsosoloso le Kagosešwa ya Ikonomi tseo re boneng go le botlhokwa go samagana natso ka bonako – tse di jaaka go thapa batho ba le bantsi mo setshabeng go direla setshaba, go thusa go tsosolosa ikonomi le go aga mafaratlhatlha a setshaba – ke dikarolo tse di re tswelang mosola mo go tlholeng ditiro.

Jaaka go aga mafaratlhatlha le dipeeletso e le tse dingwe tsa dikarolo tse di botlhokwa mo leanong la rona la go tsosolosa ikonomi, go bona ditiro mo lephateng la dikonteraka tsa go aga di tlhatlogo ke selo se se re tiisang mooko.

MoPuongya Tekanyetsokabo e e tlhagisitsweng ka kgwedi ya Tlhakole 2022 go tlhalositswe gore tiriso ya madi a a dirisediwang mafaratlhatlha a setshaba e tla tlhatloga ka 30% mo pakeng ya dingwaga di le tharo tse di tlang mo go tla dirisiwang bokanaka R812 bilione, fa e bapisiwa le bokanaka

R627 bilione e e dirisitsweng mo dingwageng di le tharo tse di fetileng.

Boto ya Tlhabololo ya Intaseteri ya Kago sešweng jaana e sa tswa go nopola gore diporojeke tsa kago ya mafaratlhatlha a setshaba di oketsegile ka ntlha ya ditheo tse di jaaka Transnet le Eskom, mmogo le ka ntlha ya diteropo tse dikgolo le Lefapha la Ditiro tsa Puso le Mafaratlhatlha a Setshaba.

Ka Seetebosigo monongwaga re bone maemo a ikonomi ya rona a boela mo maemong a e neng e le mo go ona pele re ka welwa ke leroborobo mme seno e le ka ntlha ya maemo a GDP a a itumedi-sang mo kotareng ya ntlha ya ngwaga. Ka tlwaelo maitlhommo ke go dira gore re tswemo maemong a a kwa tlase a re leng mo go ona, ke ka ntlha ya seo re samaganeng le go fetola maemo mo ditheong tsa rona tse di nang le seabe se segolo mo kgolong ya ikonomi.

Sešweng jaana puso e phasaladitse molao o o kwalotsweng sešwa o maitlhommo a ona e leng go phimola ditlhokwa tse di reng ditheo tsa tlhagiso ya motlakase o o rileng di tshwanetswe go bo di reboletseweng dilaesense tsa go dira jalo mme seno se tla rotloetsa gore dipeeletso di susumoge, go dira gore diporojeke tsa thekiso ya motlakase o o tlhagisiwang motlakase wa

teng o gokelelwe mo diyuniti tsa tlanelo ya motlakase. Seno ke sesupo sa kgato e kgolo e re e fitlheltseng mo maitekong a rona a go fetola seemo sa motlakase ka fa nageng, e leng selo se se botlhokwa thata mo go godiseng ikonomi le mo go ngokeleng dipeeletso.

Fa e sale leano la naga la motlakase le itsesiwe ka Phukwi monongwaga, re le puso re ntse re samagane le go dirisana le bannaleseabe ba bangwe mo go tsenyeng tirisong le mo go kwaleng sešwa pholisi eno.

Fa e sale re fetola gore dilaesense di se tlhokagale mo batlthagiseng ba motlakase wa dimekawate di le 100 ka Seetebosigo 2021, jaanong go setse go kwadisitswe diporojeke tsa motlakase o o fetlhiwang ka ditsela tse dintshwa tse di tlhagisang motlakase o o fetang dimekawate di le 500, mme gape go na le motselsetsele wa diporojeke tse di tlhagisang motlakase o o fetang dimekawate di le 6 000 tse di leng mo maemong a a farologaneng a go konosediswa.

Dikgato tsa go rulaganya sešwa ditheo tsa rona di tswelotse go re tswela mosola mo go emeng nokeng kgolo ya ikonomi le ngokelo ya dipeeletso.

Ntle le go tsaya dikgato tse di boima tse re tlhokang go di tsaya tsa go rulaganya sešwa ditheo tsa rona gore re kgone go tokafatsa seemo sa

dikgwebo le dipeeletso re ka se kgone go tlhola ditiro mme fa re sa dire jalo ikonomi e ka se kgone go gola. Ano ke mai-karabelo a puso e tshwanetseng go a rwala.

Ka jalo, gore re kgone go nna le bonnete jwa gore re tla atlega, re le puso re tla tshwanelwa ke go nna monwana le lenala le dikgwebo, mekgatlho ya badiri le ya baagi e seng fela fa go tla mo dikarolong tseo re tshwanetseng go di fetola, mme gape le mo go thusaneng gore re fithelele dipeelo tseo re di ipeetseng.

Le fa tota dikgato tsa go tsosolosa ikonomi ya rona di tsaya lobaka go itharabologelwa le fa re setse re tsentse tirisong letsholo la go rulaganya sešwa ditheo tsa rona, re tla tswelela go tsaya dikgato tse dingwe tse dintsi tse di farologaneng tsa mothale ono go ema nokeng dikgato tsa go tlhola ditiro.

Mo dikgatong tsa go ema nokeng makala a poraefete gore a kgone go gola, re tla oketsa gape le matsholo a puso a go tlhola baagi ditiro le go dira bonnete jwa gore go nna le matsholo a go tlhokomela baagi ba naga ya rona ba ba dikobo dikhutshwane.

Dipalopalo tse di tlhatlogileng tsa batho ba ba thapiwang, mmogo le ditiragalo tse dingwe tse di itumedi-sang tse re itemogelang tsona tse di bontshang gore re tota re itharabologelwa ke selo se se tshwanetseng go re tiisa mmoko gore re dire ka natla mo go fetoleng ditheo tsa rona re tle re kgone go tsenya tirisong Leano la Itharabologelo le Kagosešwa ya Ikonomi gore le kgone go bulela dipeeletso le kgolo ya ikonomi ya rona. Seno se tshwanetse go rotloetsa botlhe ba ba nang le seabe mo go thusaneng le baagi gore ba dirisane jaaka monwana le lenala le go abelana ka thuso ya ka bonako le go dira jalo ka maitlhommo a le mang e leng a go tliisa kgolo ka bonako le go tlhola ditiro tse dingwe tse dintsi. **U**